



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-1/21-3-40-114-5/24**

Datum: **08.07.2024. god**

«Agencija za vodno područje rijeke Save» Sarajevo rješavajući po zahtjevu pravnog lica «ZIM» d.d. Zenica za donošenje rješenja o vodnoj dozvoli za ispuštanje tehnoloških otpadnih voda u prirodni recipijent sa lokaliteta pogona za preradu mlijeka i proizvodnju mliječnih proizvoda izgrađenog u naselju Kanal, grad Zenica na osnovu člana 109. stav (1) tačka 2. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 48/99 i 61/22), donosi

R J E Š E N J E **o vodnoj dozvoli**

1. Daje se vodna dozvola pravnom licu, «ZIM» d.d. Zenica za ispuštanje tehnoloških otpadnih voda u prirodni recipijent sa lokaliteta pogona za preradu mlijeka i proizvodnju mliječnih proizvoda izgrađenog u naselju Kanal na zemljištu označenom kao k.č. broj: 411/5, 431,432 i 435/2 K.O. Ričice, grad Zenica.
2. Vodna dozvola se daje na osnovu dostavljene dokumentacije, utvrđenog činjeničnog stanja, dostavljenog detaljnog dinamičkog plana i uz sljedeće uslove:
 - 2.1. Da se upotreba i korištenje predmetnog pogona u naselju Kanal, grad Zenica vrši u skladu sa njegovom prirodom i namjenom te u skladu sa dostavljenom dokumentacijom i uslovima iz ove vodne dozvole.
 - 2.2. Da se, u skladu sa dostavljenim dinamičkim planom, ovjerenim i potpisanim od strane odgovornog lica podnosioca zahtjeva, a koji je sastavni dio ovog Rješenja, do 30.06.2026. godine završe radovi na prikupljanju tehnoloških otpadnih voda, radovi na izgradnji postrojenja za tretman tehnoloških otpadnih voda te ispuštanju prečišćenih voda u rijeku Bosnu sa lokaliteta pogona «ZIM» d.d. Zenica u naselju Kanal, grad Zenica, a sve prema investiciono-tehničkoj dokumentaciji urađenoj od strane «IBIS» d.o.o. Zavidovići, decembar 2013. godine i januar 2019. godine.
 - 2.3. Da se u periodu do 01.07. do 30.09.2024. godine završi postupak prikupljanja i evaluacije pristiglih ponuda te konačan odabir i potpisivanje ugovora sa najpovoljnijim izvođačem građevinskih radova.
 - 2.4. Da se u periodu od 01.09. do 31.12.2024. godine završe aktivnosti nabavke neophodnog repromaterijala za izvođenje radova.
 - 2.5. Da se u periodu od 01.11.2024. do 31.05.2025. godine završi aktivnosti na izvođenju građevinskih radova u cilju montiranja linije za prečišćavanje tehnoloških otpadnih voda.
 - 2.6. Da se u periodu od 01.06. do 31.08.2025. godine završe aktivnosti pregleda dostupne opreme za instaliranje sistema a potom do 30.10.2025. godine izvrši konačno definiranje zastarjele i nedostajuće opreme sistema za prečišćavanje otpadnih voda.
 - 2.7. Da se u periodu od 01.11. do 31.12.2025. godine izvrši nabavka dodatne opreme za sistem prečišćavanja otpadnih voda sa izvođenjem građevinskih radova u cilju konačnog montiranja linije za prečišćavanje tehnoloških otpadnih voda.
 - 2.8. Da se u periodu od 01.01. do 30.03.2026. godine izvrši montiranje hemijsko-biološkog sistema tretmana otpadnih voda sa probnim radom istog.
 - 2.9. Da se u periodu od 01.04. do 30.06.2026. godine izvrši puštanje sistema u rad sa priključkom izgrađenog sistema na gradski kolektor.
 - 2.10. U toku izvođenja radova na predmetnom lokalitetu neophodno je osigurati stručni nadzor nad izvođenjem istih te poduzeti sve potrebne mjere zaštite da predmetnim aktivnostima ne dođe do nastanka štete ili nepovoljnih posljedica po vode i vodni režim kao i postojeće korisnike voda.

- 2.11. Materijal iskopan u toku izvođenja radova na izgradnji novog sistema za prikupljanje, odvodnju i tretman otpadnih voda se ne smije ni privremeno odlagati na česticu «vodno dobro», odnosno u rijeku Bosnu i na njene obale.
- 2.12. Otpad nastao u postupku prerade mlijeka i proizvodnje mliječnih proizvoda, talog iz postrojenja za tretman tehnoloških otpadnih voda i separatora ulja kao i ostali opasni i neopasni otpad, ne smiju se ni privremeno odlagati na česticu «vodno dobro» odnosno u rijeku Bosnu i na njene obale.
- 2.13. Praktikovati suho čišćenje podova objekata pogona prije pranja vodom kako bi se što više uklonile nečistoće sa radnih površina, trošilo manje vode za pranje te smanjilo zagađenje voda.
- 2.14. Da korisnik predmetnog pogona, za vrijeme trajanja ove dozvole, a nakon završetka radova predviđenih projektnom dokumentacijom, obezbjeđuje da se tehnološke otpadne vode nastale u postupku prerade mlijeka i proizvodnje mliječnih proizvoda nakon tretmana u postrojenju zajedno za prečišćenim otpadnim vodama sa radnih i manipulativnih površina (nakon tretmana u separatoru ulja i masti) nesmetano sakupljaju i preko okna za monitoring ispuštaju u rijeku Bosnu (dok se ne steknu uslovi za priključak na gradsku kanalizacionu mrežu).
- 2.15. Da se usvojenim tehničkim rješenjima iz dostavljene projektne dokumentacije i realizovanim radovima poduzmu sve potrebne mjere kojima bi se obezbijedilo da prečišćene otpadne vode, prije ispuštanja u recipijent zadovolje granične vrijednosti emisija otpadnih voda utvrđene u Prilogu 4. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20, 96/20 i 01/24).
- 2.16. U skladu sa članom 26.a Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20, 96/20 i 1/24) nosilac prava iz ove vodne dozvole dužan je izvještavati nadležnu Agenciju i Federalno ministarstvo okoliša i turizma o realizaciji planiranih aktivnosti u zadatim rokovima iz detaljnog dinamičkog plana, prvi put najkasnije do 31.12.2024. godine a drugi put najkasnije do 30.06.2025. godine na obrascu iz Priloga B navedene Uredbe.
- 2.17. Nakon izgradnje svih objekata za prikupljanje i tretman tehnoloških i drugih otpadnih voda obuhvaćenih projektnom dokumentacijom i dinamičkim planom Investitor je u obavezi da uradi Projekat izvedenog stanja odvodnje i tretmana otpadnih voda cijelog kompleksa i isti priloži prilikom podnošenja zahtjeva za izdavanje nove vodne dozvole.
- 2.18. Nakon realizacije projektom predviđenih radova na sistemu prikupljanja i tretmana tehnoloških otpadnih voda, u prisustvu nadzora radova izvršiti potpuno blindiranje (zatvaranje) postojećeg ispusta otpadnih voda u rijeku Bosnu a na novom odvodnom cjevovodu a prije ispusta u recipijent, izvesti posebno reviziono okno koje će služiti kao okno za uzimanje uzoraka (monitoring okno).
- 2.19. Objekte kako postojeće, tako i one koji će se, nakon realizacije predviđenih radova, koristiti u svrhu prikupljanja, odvodnje i tretmana tehnološki i ostalih otpadnih voda nastalih u krugu pogona (kanalizaciona mreža, kanali za prihvrat otpadnih voda, postrojenje za tretman tehnoloških otpadnih voda, separator ulja i masti ...) potrebno je održavati i koristiti na takav način koji će obezbijedi njihovu potpunu ispravnost i funkcionalnost. O načinu i vremenu radova održavanja neophodno je voditi službenu evidenciju i arhivu.
- 2.20. Da se u skladu sa propisima iz oblasti zaštite okoliša, vrši bezbjedno i redovno skupljanje čvrstog opasnog i neopasnog otpada sa kompletnog kruga pogona «ZIM» d.d. Zenica, isti propisno skladišti do njegovog konačnog zbrinjavanja od strane ovlaštene organizacije.
- 2.21. Vlasnik odnosno korisnik objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring na mjestu ispusta u skladu sa Uredbom o uslovima ispuštanja otpadnih voda u okoliš i sisteme javne kanalizacije. Učestalost i način ispitivanja vršiti u skladu sa članom 20. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20, 96/20 i 01/24). Rezultate analiza dostaviti ovoj Agenciji.

- 2.22. Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlasti («Službene novine Federacije BiH», broj 14/10, 14/3, 26/14, 15/17, 23/17 i 41/20).
- 2.23. Vlasnik odnosno korisnik objekta je obavezan pridržavati se svih mjera i uslova propisanih u saglasnostima i dozvolama izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.
3. Vlasnik, odnosno korisnik pogona je, u skladu sa Zakonom o vodama i Pravilnikom o načinu obračunavanja, postupku i rokovima za obračunavanje, plaćanje i kontrolu izmirivanja obaveza na osnovu opšte vodne naknade i posebnih vodnih naknada («Službene novine Federacije BiH», broj 92/07, 46/09, 79/11, 88/12 i 03/16), na osnovu utvrđenog stepena zagađenja ispuštenih otpadnih voda izraženog preko broja EBS-a (ispitivanje urađeno od strane ovlaštene laboratorije) obavezan je, za utvrđeni broj EBS-a prema rezultatima ispitivanja, plaćati posebnu vodnu naknadu za zaštitu voda.
4. U periodu važenja ove dozvole, vlasnik odnosno korisnik pogona je dužan provoditi sve mjere i aktivnosti propisane istom.
5. U slučaju vanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, vlasnik odnosno korisnik predmetnog pogona obavezan je izvijestiti nadležne organe i izvršiti vanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.
6. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na predmetnom pogonu i radnom prostoru obuhvaćenim ovom vodnom dozvolom, korisnik zaštitnih vodnih objekata nije odgovoran za nastale štete.
7. Ukoliko radom predmetnog objekta dođe do šteta ma kakvog karaktera, korisnik vodne dozvole je dužan uzroke nastalih šteta otkloniti, a nastale štete trećim licima nadoknaditi.
8. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
9. U ovoj upravnoj stvari plaćene su sve upravne takse.
10. Ova vodna dozvola, shodno članu 26. stav 1. Uredbe o uslovima ispuštanja otpadnih voda u okoliš i sisteme javne kanalizacije se daje sa rokom važenja 30.06.2026. godine, uz uslov da se aktivnosti obuhvaćene tačkom 2. dispozitiva rješenja u cjelosti poštuju.
11. Prije isteka važnosti ove dozvole korisnik je dužan da podnese zahtjev za izdavanje nove vodne dozvole.
12. Ovo rješenje o vodnoj dozvoli može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

O b r a z l o ž e n j e

Pravno lice, «ZIM» d.d. Zenica, podnijelo je ovoj Agenciji dana 08.03.2024. godine zahtjev za izdavanje vodne dozvole za ispuštanje tehnoloških otpadnih voda u prirodni recipijent sa lokaliteta pogona za preradu mlijeka i proizvodnju mliječnih proizvoda izgrađenog u naselju Kanal na zemljištu označenom kao k.č. broj: 411/5, 431,432 i 435/2 K.O. Ričice, grad Zenica.

U provedenom postupku dostavljena je i pregledana sljedeća dokumentacija:

- Ovjerena kopija Aktuelnog izvoda iz sudskog registra broj: 043-0-RegZ-24-000260 izdatog dana 29.01.2024. godine od strane Općinskog suda u Zenici,
- Ovjerena kopija Rješenja o izmjenama podataka u sudski registar broj: 043-0-Reg-23-000326 izdatog dana 23.03.2023. godine od strane Općinskog suda u Zenici,
- Kopija Uvjerenja o poreznoj registraciji izdatog dana 07.09.2011. godine od strane Porezne uprave – Kantonalni ured Zenica,
- Kopija Uvjerenja o registraciji/upisu u Jedinostveni registar obveznika indirektnih poreza broj: 04/1-UPP/1-8193/07 izdatog dana 01.08.2007. godine od strane Uprave za indirektno-neizravno oporezivanje Banja Luka,

- Kopija Rješenja o upotrebnoj dozvoli broj: 10-360-43/86 izdatog dana 07.04.1986. godine od strane nadležne službe opština Zenica,
- Kopija Rješenja o vodnoj dozvoli broj: UP-I/25-3-40-026-5/19 izdatog dana 05.03.2019. godine od strane «Agencije za vodno područje rijeke Save» Sarajevo,
- Glavni projekat uređaja za tretman otpadnih voda iz objekata «ZIM» d.d. Zenica (anaerobni biološki tretman) urađen od strane «IBIS» d.o.o. Zavidovići (šifra: 83-IB-G/13, decembar 2013. godine) te revidovan od strane «HIGRACON» d.o.o. Sarajevo,
- Glavni projekat uređaja za tretman otpadnih voda iz objekata «ZIM» d.d. Zenica (filterski segment anaerobnog biološkog prečišćaća – prva faza) urađen od strane «IBIS» d.o.o. Zavidovići (šifra: 03-IB-G/19, januar 2019. godine),
- Kopije Izvještaja o monitoringu kvaliteta i kvantiteta otpadnih voda broj: 109/24, februar 2024.; broj: 1678/23, decembar 2023.; broj: 1406/23, oktobar 2023.; broj: 1144/23, august 2023.; broj: 914/23, juni 2023.; broj: 601/23, april 2023.; broj: 149/23, februar 2023. godine urađenih od strane «Inspekt-RGH» d.o.o. Sarajevo,
- Kopija Izvještaja o rezultatima ispitivanja tereta zagađenja otpadnih voda izraženog preko EBS-a za «ZIM» d.d. Zenica broj: 14/22, juni 2022. godine, urađenog od strane «Inspekt-RGH» d.o.o. Sarajevo,
- Opći akt o održavanju, korištenju i osmatranju vodnog objekta i postupanje u slučaju kvara ili havarije, juni 2012. godine,
- Operativni plan mjera u slučaju vanrednih i incidentnih zagađenja, juli 2023. godine,
- Kopija Dopisa/Informacije broj: 204-3212/24 IM dostavljenog dana 13.03.2024. godine od strane JP «Vodovod i kanalizacija» d.o.o. Zenica vezano za aktivnosti izgradnje postrojenja za tretman otpadnih voda grada Zenica i mogućnosti priključka pogona «ZIM» d.d. Zenica na planirani desnoobalni kolektor,
- Kopija Ugovora broj: 392/23-DS o čišćenju separatora zaključenog dana 09.03.2023. godine između «ZIM» d.d. Zenica i «DELTA PETROL» d.o.o. Kakanj (prilog: radni Zapisnik o čišćenju separatora broj: 02/04/23 od 14.04.2023. godine; faktura broj: 001230-1 od 17.04.2023. godine),
- Ovjeren Dinamički plan sa aktivnostima, finansijskom procjenom i rokovima realizacije za 2024., 2025. i 2026. godinu za izgradnju i puštanje u rad sistema za prikupljanje, tretman i ispuštanje tehnoloških otpadnih voda pogona Zeničke industrije mlijeka «ZIM» d.d. Zenica (dopis broj: 231/24 od 03.07.2024. godine sa obrazloženjem broj: 230/24),
- Dokaz o uplaćenju upravnoj taksi na zahtjev.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 12. stav (5) i (6) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj: 31/15, 55/19, 41/20 i 63/22) izvršen je obilazak predmetnog lokaliteta pogona za preradu mlijeka i proizvodnju mliječnih proizvoda izgrađenog u naselju Kanal na zemljištu označenom kao k.č. broj: 411/5, 431,432 i 435/2 K.O. Ričice, grad Zenica i tom prilikom je sačinjen Zapisnik o uviđaju broj: UP-1/21-3-40-114-2/24 od 02.04.2024. godine.

Na osnovu dostavljene dokumentacije i izvršenog uviđaja na licu mjesta utvrđeno je sljedeće:

Predmetni kompleks pogona za preradu mlijeka i proizvodnju mliječnih proizvoda izgrađen je 1959. godine u naselju Kanal, grad Zenica. Kompleks čine: sektor proizvodnje, sirana, kontrola tehnoloških postupaka i gotovih proizvoda, mašinska radionica, praonica vozila, kotlovnica i upravno-administrativni sektor. Max kapacitet prerade mlijeka je 50.000 l/dan a trenutni je oko 30.000 l/dan. Sirovo mlijeko se dovozi kamionima sa područja Zeničko-dobojskog i Srednjobosanskog kantona. Mlijeko se filtrira i nakon hlađenja na 4°C skladišti u prijemne tankove. Nakon skladištenja pristupa se termičkoj i drugoj obradi mlijeka a potom proizvodnji mliječnih proizvoda: pasterizovano i streilno mlijeko, jogurt, pavlaka, sir, namazi, maslac i dr.

Sanitarno-fekalne otpadne vode iz toaleta za uposlene se ispuštaju u septičku jamu a potom pumpnim sistemom prebacuju u gradsku kanalizacionu mrežu.

Oborinske vode sa radnih i manipulativnih površina kompleksa, prostora radionice i praonice vozila sa sakupljaju zasebnim sistemom kanalizacione mreže i odvođe do separatora masti i ulja sa preljevom u rijeku Bosnu. Čišćenje separatora i zbrinjavanje opasnog otpada se vrši redovno od strane «DELTA PETROL» d.o.o. Kakanj (priložen radni zapisnik o čišćenju separatora od 14.04.2023. godine).

Tehnološke otpadne vode koje nastaju u procesu pranja na mjestima pretakanja mlijeka iz cisterni u tankove, u procesu pranja i dezinfekcije tehnoloških linija tokom standardizacije i pasterizacije, pranja mašina, uređaja, tehnološke opreme, radnih površina i podova se zasebnim kanalizacionim sistemom bez odgovarajućeg tretmana ispuštaju u rijeku Bosnu.

Monitoring otpadnih voda (mjerno mjesto E₁) se vrši redovno u kontrolnom oknu izgrađenom na preljevu iz separatora a nakon miješanja sa tehnološkim otpadnim vodama iz procesa proizvodnje.

Prema podacima iz dostavljenih Izvještaja o rezultatima ispitivanja kvaliteta (monitoring) otpadnih voda za period februar 2023. – februar 2024. godine utvrđena su prekoračenja MDK definisanih Uredbom o uslovima ispuštanja otpadnih voda u okoliš i sisteme javne kanalizacije za: pH vrijednost, suspendovane materije, HPK, BPK₅, ukupni fosfor, amonijačni azot, ukupni azot).

Prema dostavljenom Izvještaju o rezultatima ispitivanja tereta zagađenja otpadnih voda izraženog preko EBS-a urađenom u junu 2022. godine, ukupan teret zagađenja otpadnih voda izražen kao ekvivalentni broj stanovnika na mjernom mjestu E₁ (ispust u rijeku Bosnu): EBS=1.686,0 ES-a.

Na predmetnom lokalitetu u naselju Kanal planirano je polaganje tzv. desnoobalnog kolektora za prikupljanje i odvodnju otpadnih voda na buduće postrojenje za tretman otpadnih voda grada Zenica (kolektor prati saobraćajnicu ispred objekata «ZIM» d.d. Zenica) te će prema dopisu broj: 204-3212/24 IM od 13.03.2024. godine biti moguće priključenje tehnoloških i ostalih otpadnih voda pogona «ZIM» d.d. Zenica na isti ali tek uz zadovoljenje svih potrebnih parametara (granične vrijednosti emisije) propisanih Uredbom o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20, 96/20 i 01/24).

Prema dostavljenoj projektnoj dokumentaciji (Glavni projekat uređaja za tretman otpadnih voda iz objekata «ZIM» d.d. Zenica urađen od strane «IBIS» d.o.o. Zavidovići, decembar 2013. godine i januar 2019. godine, predviđen je anaerobni biološki tretman (sa nadogradnjom filterskog segmenta biološkim materijalom) zasebnom kanalizacionom mrežom prikupljenih tehnoloških otpadnih voda nastalih preradom mlijeka, pranjem opreme CIP sistemom, radnih površina, podova i sl.

Za predmetni pogon je u ranijem postupku, dana 05.03.2019. godine, od strane ove Agencije doneseno Rješenje o vodnoj dozvoli broj: UP-I/25-3-40-026-5/19. Navedeno Rješenje o vodnoj dozvoli izdato je u skladu sa članom 13. stav (5) Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 101/15, 1/16 i 101/18) uz uslov da se realizuju aktivnosti iz dinamičkog plana obuhvaćene tačkom 2.1. dispozitiva navedenog rješenja.

Prilikom uviđaja na terenu utvrđeno je da aktivnosti i rokovi navedeni u dinamičkom planu, a odnose na izvođenje radova po Glavnom projektu a koji su dati kroz uslove Rješenja, nisu ispunjeni.

Od ponosioca zahtjeva je u skladu sa članom 1. stav (1), (3) i (4) Uredbe o izmjenama i dopunama Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj: 26/20, 96/20 i 1/24) dopisom broj: UP-1/21-3-40-114-3/24 od 29.04.2024. godine zatraženo da dostavi detaljan dinamički plan koji treba da sadrži:

- Spisak aktivnosti i mjera sa finansijskom procjenom za ulaganje, zadanim rokovima realizacije svake pojedine aktivnosti i konačnim rokom za završetak aktivnosti na izgradnji i puštanju u rad sistema za prikupljanje, tretman i ispuštanje onečišćenih otpadnih voda na obrascu iz Priloga A ove Uredbe, razrađen po godinama i mjesecima sa konačnim rokom realizacije najkasnije do roka 30.06.2026. godine.

Dana 08.07.2024. godine dostavljen je akt broj: 231/24 od 03.07.2024. godine sa prilogom Dinamičkog plana na obrascu iz Priloga A Uredbe i Obrazloženje broj: 230/24 od 03.07.2024. godine o nepostupanju po obavezama iz Rješenja o vodnoj dozvoli izdatoj 2019. godine.

U dinamičkom planu su navedene aktivnosti i rokovi sa finansijskom procjenom za ulaganje na izgradnji i puštanju u rad sistema za prikupljanje, tretman i ispuštanje tehnoloških otpadnih voda sa lokaliteta pogona za preradu mlijeka i proizvodnju mliječnih proizvoda izgrađenog u naselju Kanal, grad Zenica za period od juna 2024. do juna 2026. godine. Aktivnosti i rokovi iz dinamičkog plana su propisani u dispozitivu ovog Rješenja.

Na osnovu uvida u dostavljeni dinamički plan utvrđeno je sljedeće:

- Krajnji rok za realizaciju radova predviđenih dostavljenom projektnom dokumentacijom Glavni projekat uređaja za tretman tehnoloških i fekalnih otpadnih voda iz objekta «ZIM» d.d. Zenica urađen od strane «IBIS» d.o.o. Zavidovići, 2013 i 2019. godine) je 30.06.2026. godine.
- Rokovi za realizaciju pojedinih aktivnosti iz dostavljenog dinamičkog plana koji je sastavni dio ovog rješenja su navedeni u tački 2.3. do 2.9. dispozitiva.

Na osnovu dostavljene dokumentacije, uviđaja izvršenog na predmetnoj lokaciji i dostavljenog dinamičkog plana, u svrhu smanjenja negativnih uticaja predmetnog pogona i aktivnosti na stanje voda i vodni režim, podnosiocu zahtjeva su ovom vodom dozvolom u tački 2. dispozitiva Rješenja propisani uslovi kojih se dužan pridržavati prilikom korištenja predmetnog pogona za preradu mlijeka i proizvodnju mliječnih proizvoda u skladu sa odredbama člana 53. i 116. Zakona o vodama, člana 12. i 13. Pravilnika o sadržaju, obliku, uslovima, načinu izdavanja i čuvanja vodnih akata i odredbama člana 3. tačka s) i člana 15. Uredbe o uslovima ispuštanja otpadnih voda u okoliš i sisteme javne kanalizacije.

Tačka 4. dispozitiva Rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada («Službene novine Federacije BiH», broj 92/07, 46/09, 79/11 i 88/12) i Odlukom o visini posebnih vodnih naknada («Službene novine Federacije BiH», broj 46/07, 10/14 i 03/16).

Na osnovu provedenog postupka konstatuje se da je podnosilac zahtjeva, «ZIM» d.d. Zenica ispunio minimum uslova za izdavanje vodne dozvole za ispuštanje tehnoloških otpadnih voda u prirodni recipijent sa lokaliteta pogona za preradu mlijeka i proizvodnju mliječnih proizvoda u naselju Kanal, grad Zenica te je riješeno kao u dispozitivu ovog Rješenja.

U skladu sa članom 61. Zakona o vodama i odredbama Pravilnika o postupcima i mjerama u slučajevima akcidenta na vodama i obalnom vodom zemljištu («Službene novine Federacije BiH», broj 71/09 i 102/18) korisniku predmetnog pogona utvrđene su obaveze u tački 6. dispozitiva ovog Rješenja.

Uputa o pravnom lijeku:

Protiv ovog Rješenja može se uložiti žalba Federalnom ministarstvu poljoprivrede, vodoprivrede i šumarstva u roku od 15 dana od dana prijema Rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obradivač akta:

Nermina Hodžić, dipl.ing.građ.

Po ovlaštenju
Rukovodilac Sektora za izdavanje
vodnih akata

Nihad Pezo, dipl.inž.građ.



Dostaviti:

- «ZIM» d.d. Zenica
ul Kanal br 32, 72000 Zenica
- AVP Sava, ISV – Vodna knjiga
- Sektor 50
- Sektor 40 - arhiva
- Oglasna ploča - AVP Sava